

09. maj 2017

Meeqqat atuarfianni nukarlerni ilitsoqqussaralugu oqaatsit kisiisa atorlugit atuartitsaler-nermi pitsaaqutigisinnaasai pitsaanngequtigisinnaasalu pillugit, Naalakkersuisut misissueq-qullugit peqquneqarnissaannik Inatsisartut aaliangiiffigisassaatut siunnersuut. Tamatumani ilitsoqqussaralugu oqaatsit danskisut kalaallisullu oqaatsit pineqarput, misissuinermilu angusat UPA2018 sioqquullugu Inatsisartunut saqqummiunneqareersimassapput.

(Inatsisartuni ilaasortaq Peter Olsen, Inuit Ataqatigiit)

Inatsisartuni ilaasortap Inuit Ataqatigiinneersup Peter Olsen aalajangiiffigisassatut siunnersuutaannut Siumumiit imatut oqaaseqassaagut.

Meeqqat atuarfiat tassaavoq kinguaariit ilisimasassanik ingerlatitseqqiisarfiat. Meeqqat atuarfiat inuiannit kikkuugaluartunit tamanit qitiulluni inissismavoq, meeqqammi atuarfianniippumeeqqat inuiaqatigiit pitsasumik ingerlaqqinnissaannut kivitsisussat nangitsisussallu.

Nunaavugut oqaluttuarisaanikkut alloriarfennik ilaatigut oqitsuinnaanngitsunik kinguaariillu inuunerannut annertuunik sunniutilinnik aqquaagaqarsimasut. Nunarsuarmi inuaat siuarsimasutut imminnut taasartut aqquaarfiit ukiorpassuarni nikeriarfigisarsimasaat nunatsinni piffissap sivikit-suarannguup iluani aqquaarsimavagut misilinneaqtigalugillu. Taanaannarluunniit qiviassagutsigu killiffippumeeqqat qanoq naleqqussarsinnaanermik annertutigisumik pigisaqarnitsinnik takutittuarpaatigut.

Meeqqat atuarfiat oqallisigitillugu ukiuni kingullerni pikkoriffigivallaarsimanngisarput aallartivitsinnanga eqqaalaarlara, iluatsinnerusimasinnaasatsinnik iluatsissimanngisatsinnillu oqalliseqarnitsinni iluatsissimasatsinnik aamma oqalliseqartarnissarput pingaaruteqarluinnarmat, iluatsissimasavullu sunik sakkoqarluta qanorlu iliornitsigut angusimaneri tamatigut eqqumaffigineqartariaqarmata, tassaniimmat nukik iluatsissimanngisatsinnik nukillaartitsisussaq.

Siunnersuuteqartup meeqqat atuarfianni nukarlerni ilitsoqqussaralugu oqaatsit kisiisa atorlugit atuartitsisalernermi pitsaaqutigisinnaasat pitsaanngequtigisinnaasallu pillugit misissueqqusinera soqutiginaateqartutut isigaarput, naak misissuisitsinissami immitsinnut tunngavigisinnaanngik-

kaluartugut nunani allani ilisimatusarnerni suliaareersut misilittagaareersullu sakkussatut atorneqarsinnaasut tamaasa pisariaqartinneqartut ujartuiffiguarneqartariaqartullu Siumumiit isumaqarfingatsigu.

Taamak oqariartuuteqarluta eqqaasitsissutigissavarput Naalakkersuisut oqaatsnik ilinniartitsinermi misissueqqissaartussanik pilersitsinikuummata. Suleqatigiissitaq oqaatsnik ilikkalertortarnermi imikkut ilisimasallit maanna sulinertik ingerlappaat, taamaammat suliat assigiimmik siunertaqartut imminnut qalleraatinnginnissaq pingaartillugu kaammattutigaarput suleqatigiissitap nalunaarusiornissaa utaqqineqassasoq.

Taamaakkaluartoq soqtiginaateqartutut isigaarput meeqqat atuarfiini periutsit ullumikkut atorneqartut allat isummersorfigissallugit, soorlu meeqqat ikaarsaariarfinni tamani misilitsittarnerat (trintest) ilumut pissusissamisoornersoq allatullu iliortoqarsinnaannginnersoq isumaliutigalugu.

Tassunga aamma ilaaqqissaarpoq atuagarsornerup timimillu aalatitsinerup assaallu atorlugit inerititaqarnikkut qaffasinnerusunik angusaqartitsisarnerata pingartinneqarnissaa, timersornikkut, assassornikkut atuagarsornikkullu agguaqatigiinnerusumik ingerlatsinerup meeqqat ajugaasutut misigisussat amerlanerungaartut pilersissammagit.

Siumumiit isumaqarpugut meeqqat meeqqatut isigineqassasut, taticissavavullu ilinniartitsisut anguniagassat aallaavigalugit ilinniartitsinertik ingerlatissagaat, imaanngitsoq meeqqat mikineriniit atuakkersornikkut pisinnaasat kisiisa aallaavigalugit agguataaleriissagivut pikkorissunut pikkorinnginnerusunullu. Meeqqat ineriertortinneqassapput assigiinngiiarnerat ataqqillugu, tassaneeqqissaarmat meeqqamik qitiutitsilluni atuartitsineq.

Meeqqat atuarfiat tassaavoq inuiaqatigiinni tamatta soqtigisariaqagarput, tamatigullu pitsanngorsaajuarnermik anersaaqarluta peqataaffigisariaqagarput.

Misissuisitsinerit sakkussanik pitsaasunik pilersitsisinnaasut ujartuiffigineqartuartariaqarmata siunnersuut qulequttanik nalilersuiffigineqartariaqartunik ilaartugaq Ilinniartitaanermut, Kultureqarnermut, Ilisimatusarnermut Ilageeqarnermullu Ataatsimiitsitaliamut appassaaneerneqartinnani ingerlateqqinngarnissaa innersuussutigaarput.

Vivian Motzfeldt - Siumut